

Unidade 1:

Antigo Réxime e Ilustración

1. Introducción

Nos séculos XVII e XVIII case toda Europa estaba baixo o que denominamos **Antigo Réxime**: sociedades europeas que manteñen un modo de vida baseado no absolutismo monárquico, na economía agraria de tipo señorial e na sociedade estamental. O termo *Antigo Réxime* foi acuñado polos revolucionarios franceses para referirse ao período anterior a 1789, ao que a propia Revolución Francesa lle puxera fin.



A **Ilustración** é un movemento cultural que xorde no século XVIII cuns postulados baseados na **razón e no progreso**. Estes ideais servirán de base tanto para un despotismo ilustrado que mantña o absolutismo monárquico (aínda que con modernización económica) como para as revolucións liberais que acabarán con este sistema.

2. A estrutura política: o absolutismo

O **absolutismo** é o sistema político que define ao Antigo Réxime, e ten como principal característica a concentración de todo o poder nas mans dos monarcas, sen limitacións.

O proceso de afianzamento da supremacía da Coroa sobre os demais estamentos iniciárase na Baixa Idade Media, e posibilitou a superación da fragmentación do poder característica do feudalismo dos séculos medievais. No feudalismo, o monarca, malia ser en teoría a cúspide da pirámide social, na práctica era un *primus inter pares* que vía o seu poder moi condicionado polo dos señores feudais, foran estes nobres ou eclesiásticos.

A estrutura política do Antigo Réxime caracterízase pola **soberanía real** e pola **xustificación divina** do poder absoluto das monarquías, xa que os reis son os representantes de Deus na terra. Debido a isto, non podía haber límites ao poder da Coroa, e os súbditos debían acatar a súa autoridade e obedecer os seus mandatos. A teoría sobre a orixe divina do poder real enlaza tamén co gran **protagonismo do clero** na política, algo que supuxo un factor de continuidade cos séculos medievais.

Un dos exemplos máis claros de monarca absoluto é **Luís XIV de Francia** (1654-1715), coñecido como o *Rei Sol*, a quen se atribúe a frase “*O Estado son eu*”.



2.1. A estrutura territorial: Estado Moderno e señoríos

A partir dos séculos XV e XVI distintas monarquías europeas comezan un proceso de afianzamento do seu poder sobre as estruturas feudais, o que supón o **xurdimento do chamado Estado Moderno**. Para reforzar o seu poder as monarquías potenciaron tres elementos:

- ➔ Un **exército permanente** que lles permitía non depender das tropas proporcionadas pola nobreza.

- ➔ Unha complexa **administración** que permitise o control dos aspectos políticos, xudiciais e económicos dos territorios, empregando funcionarios non dependentes dos señores feudais.
- ➔ Unha **Facenda** que obtivese os recursos económicos necesarios para manter toda esta estrutura.

Malia as semellanzas que se poidan atopar entre o denominado Estado Moderno do Antigo Réxime e os Estados actuais, hai que ter presente unha diferenza básica: **o Estado Moderno é un estado patrimonial**, é dicir, propiedade da Coroa, que o configura empregando estratexias de conquista ou alianzas matrimoniais e o transmite como herdanza aos seus sucesores. Como consecuencia desta situación, os habitantes dos reinos son súbditos, definidos pola obediencia ao monarca, e non cidadáns, definidos polos seus dereitos.

No Antigo Réxime, malia a formación do Estado Moderno, seguen existindo os **señoríos**, territorios nos que un señor (eclesiástico ou nobre, incluíndo ás propias monarquías) exercen o seu poder. Se no feudalismo ese poder incluía a capacidade de gobernar, xulgar e obter recursos económicos, no Antigo Réxime vai permanecer o aspecto económico, mentres que o poder político dos señores será erosionado polo afianzamento do poder real.



Francia en 1477. Neste mapa podemos observar a estrutura territorial francesa a finais da Idade Media, sobre a que se desenvolverá o Estado Moderno. Apréciase a enorme variedade de señoríos, rexidos tanto por señores laicos (nobres) como eclesiásticos (clero), e que contrastan cos de dominio real, administrados directamente pola monarquía.

2.2. Excepcións ao absolutismo: Reino Unido e Países Baixos

→ O parlamentarismo inglés

Na primeira metade do século XVII, os reis ingleses da dinastía Estuardo intentaron gobernar nos seus territorios como monarcas absolutos, pero toparon coa oposición da **burguesía**, que dominaba o Parlamento, o cal desembocou no estalido das **revolucións de 1642 e 1688**. Esta última, denominada Revolución Gloriosa, supuxo a expulsión da dinastía Estuardo do trono e o triunfo da monarquía parlamentaria. A diferenza do que sucedía nas monarquías absolutistas, o rei Guillermo de Orange aceptaba en 1689 a **Declaración de Dereitos** (*Bill of Rights*), que establecía o principio da soberanía nacional. Dentro das figuras que contribuíron ao desenvolvemento do parlamentarismo como forma política destaca John Locke (1632-1704).

→ O protagonismo político da burguesía nos Países Baixos.

Durante o século XVII as **Provincias Unidas dos Países Baixos** independizáronse da monarquía hispánica coa sinatura da **Paz de Westfalia** (1648), que marcou a fin da Guerra dos Trinta Anos. Na configuración política deste territorio holandés, caracterizado por unha grande autonomía das cidades, vai ter un enorme protagonismo político a **burguesía**, especialmente nas cidades costeiras con gran actividade comercial, coma **Amsterdam**. O auxe político desta burguesía enriquecida polo comercio vai erosionar o modelo do Antigo Réxime, no que a burguesía figuraba encadrada no Terceiro Estado, cun escaso peso político e social malia a súa posición económica. Así, os Países Baixos convertéronse na práctica nunha república, na cal o poder era exercido polos cidadáns máis influentes, os burgueses.




3. A estrutura económica: señoríos e gremios

A economía do Antigo Réxime caracterízase, en primeiro lugar, por ser fundamentalmente **agraria e rural**; é dicir, as actividades agrícolas e gandeiras eran as predominantes tanto en volume de produción como en poboación adicada a elas e, polo tanto, a maior parte da poboación vivía no mundo rural. Aínda así, ao longo do século XVIII vai ter lugar un progresivo desenvolvemento do mundo urbano tanto polo crecemento das actividades económicas asociadas á cidade (artesanía e comercio) como pola vontade das monarquías europeas de ampliar e mellorar os espazos urbanos.



A colleita, de Pieter Brueghel o Vello (1565)

A **agricultura** do Antigo Réxime caracterizábase por unha **escasa tecnificación**, unha **numerosa man de obra** e uns **rendementos baixos**. Estes elementos iranse modificando a partir das achegas da revolución científica e da Revolución Industrial, aínda que persistirán enormes contrastes rexionais no espazo europeo. En canto á propiedade, a terra estaba en mans principalmente da nobreza e o clero e, aínda que a implantación do absolutismo réstalles poder político e xudicial sobre os seus **señoríos**, reciben rendas do campesiñado. Así, a terra segue sendo a principal fonte de riqueza dos estamentos privilexiados a través do pago de numerosos tributos por parte do campesiñado, que a traballa e que vive nunhas durísimas condicións.



Ademais, as terras pertencentes a clero e nobreza están **amortizadas**, é dicir, fóra do mercado, xa que forman parte do patrimonio nobre ou eclesiástico: os representantes destes estamentos pode explotar as terras ou obter rendas do traballo nas mesmas, pero non vendelas.

No que se refire á **artesanía** do Antigo Réxime, esta estaba dominada polos **gremios**, agrupacións de artesáns de orixe feudal que monopolizaban a escala local, en vilas e cidades, os **procesos de fabricación e venda** dos produtos artesanais: roupa, calzado, mobiliario...


O **comercio exterior**, crecente a medida que transcorre a Idade Moderna, reportará grandes beneficios á burguesía europea e creará redes de intercambio a escala continental. Destacan cidades portuarias coma Londres, Sevilla ou Amsterdam.



Anónimo, *Vista da cidade de Sevilla desde Triana* no século XVI

4. A estrutura social: os estamentos. A demografía

A sociedade do Antigo Réxime ten como trazo fundamental que se atopa dividida en **estamentos**. Os estamentos son grupos sociais definidos polo nacemento e/ou o privilexio, de xeito que dan lugar a unha estratificación social ríxida e impermeable, no sentido de que é moi difícil a mobilidade entre os distintos grupos.



Distinguimos tres estamentos no Antigo Réxime, moi relacionados coa ordenación social deseñada xa durante o feudalismo medieval:


- ➔ **Clero:** formado polos representantes da Igrexa, que estaban divididos en *clero regular* (monxes e monxas) e *clero secular* (sacerdotes, párrocos). Asimesmo, existían diferenzas internas entre alto clero e baixo clero, tendo o primeiro moito máis poder. Destacarán os abades (no clero regular) e os bispos (no clero secular).
- ➔ **Nobreza:** composto por un catálogo variado de títulos de distinto rango e poder, podemos falar dunha gran diferenza entre a alta e a baixa nobreza.

Con independencia das diferenzas internas, clero e nobreza teñen en común que **son os estamentos privilexiados**: son os grandes propietarios da terra e, polo tanto, os que reciben os beneficios desta, e non están suxeitos ao pago de taxas, entre outras prerrogativas que marca o seu carácter de elite social.

→ **Terceiro Estado:** neste estamento, o maioritario desde o punto de vista numérico, están integrados todos os membros da sociedade que non pertencen nin ao clero nin á nobreza (campesiños, artesáns, burgueses...). A nota común é a súa heteroxeneidade. O que os agrupa no mesmo estamento é a *falta de privilexios* e o sometemento aos dous estamentos privilexiados mediante as relacións sociopolíticas (goberno, administración de xustiza, etc...) ou económicas (pago de rendas, taxas, etc...).

En relación coa **demografía**, o Antigo Réxime caracterízase, nos séculos XVI e XVII, por presentar os trazos típicos do denominado **réxime demográfico antigo**: altas taxas de natalidade e altas taxas de mortalidade, o que supoñía un feble crecemento demográfico, en ocasións negativo pola sobremortalidade provocada por malas colleitas e enfermidades. O século XVIII suporá o inicio da chamada **fase de transición demográfica**, na que en determinados lugares se irán reducindo as taxas de mortalidade grazas ás melloras na alimentación, a hixiene e a medicina, polo que a poboación comezará a medrar. Será tamén o momento no que comece o crecemento das **ciudades**, tanto en poboación como en número.

RÉXIMES DEMOGRÁFICOS



5. A Ilustración

Hoxe en día hai algúns principios, como os de **liberdade**, **igualdade** ou **dereitos civís**, que resultan básicos para a nosa sociedade. Sen embargo, isto non era así no Antigo Réxime, ata que, a partir do século XVIII unha serie de pensadores comezan a defender estes principios como base da sociedade, dando lugar así ao movemento da **Ilustración**.

O impacto destas ideas foi tal, que serviu tanto a monarcas que querían modernizar os seus reinos sen renunciar ao absolutismo (**despotismo ilustrado**) como ao **liberalismo** que, a partir da Revolución Francesa e ao longo do século XIX, rematará co Antigo Réxime.

Entre os **principios da Ilustración** destacan os seguintes:

- ➔ Uso da **razón** como fonte de todo o coñecemento. Debido á luz da razón, o século XVIII foi coñecido como o *Século das Luces*.
- ➔ Confianza no **progreso** constante da humanidade, que debe conducir á **felicidade**.
- ➔ Fomento da **educación** como medio de conseguir o progreso.

Entre os **medios de difusión** característicos da Ilustración podemos sinalar:

- ➔ A **Enciclopedia** promovida polos franceses Diderot e D'Alembert, que pretendía compilar e difundir os logros do saber adquiridos pola aplicación da razón.
- ➔ **Salóns e faladoiros**, vencellados á elite social e nos que atoparon oco os postulados ilustrados. Destacan os salóns promovidos por mulleres da aristocracia (Tencin...).
- ➔ As **Academias**, unhas institucións creadas polos monarcas coa finalidade de potenciar unha determinada actividade cultural (Academia de Belas Artes de San Fernando, Real Academia Española, etc...).

Entre os principais representantes da Ilustración podemos sinalar a **Locke**, **Kant**, **Montesquieu**, **Voltaire** ou **Rousseau**. Tamén neste momento empezan a oírse voces de mulleres reclamando os mesmos dereitos, como **Madame de La Fayette** ou **Olympe de Gouges**.



5.1. O despotismo ilustrado

Denomínase **despotismo ilustrado** á adaptación das monarquías europeas ás novas ideas da Ilustración.

Unha boa parte das monarquías europeas do século XVIII foron conscientes da necesidade de modernizar os seus Estados. Así, tentaron **adaptar as ideas de razón, educación e progreso**, características dos autores ilustrados, **pero sen transformar a estrutura política do Antigo Réxime**; é dicir, mantendo o absolutismo. O mellor resumo do carácter contradictorio do despotismo ilustrado é a frase que o sintetiza: “todo para o pobo, pero sen o pobo”.

Como **representantes** do despotismo ilustrado podemos sinalar a Federico II de Prusia, Carlos III de España, Luís XVI de Francia ou Catarina a Grande de Rusia. As **medidas** que levaron a cabo durante os seus reinados buscaron a modernización: creación de escolas, hospitais e centros de investigación, fomento de infraestruturas e obras públicas (estradas, portos, sistemas de abastecemento), introdución de melloras na agricultura e na produción artesanal (colonizacións agrarias, reais fábricas), etc.

6. A revolución científica

A evolución do Antigo Réxime ao longo de tres centurias, do século XVI ao XVIII, vai ir acompañada dunha **revolución científica** que supuxo a maioría de idade da ciencia como coñecemento, independizada cada vez máis da fe e da tradición.

Aínda que é imposible establecer un punto de partida concreto para o esa “revolución científica”, adoita usarse como referencia a publicación en 1543 da obra *De revolutionibus*, de Nicolás **Copérnico**. Do mesmo xeito, a obra *Principia*, de Isaac **Newton**, de 1687, marca a súa fin. Desta época son outros destacados científicos como Francis **Bacon**, Johannes **Kepler** ou **Galileo Galilei**.

No século XVIII, como consecuencia da revolución científica dos séculos anteriores e do pensamento ilustrado, a ciencia e as viaxes de exploración (como as levadas a cabo por James **Cook**) experimentaron un grande auxe, con **descubrimentos** e **avances técnicos** que cambiaron para sempre a vida das persoas. Entre os científicos máis destacados do século XVIII, podemos mencionar a Anders **Celsius**, Gabriel **Fahrenheit**, Benjamin **Franklin** ou o matrimonio formado por Marie e Antoine **Lavoisier**.

7. España no século XVIII

O século XVIII comeza en España coa **Guerra de Sucesión** (1701-1713), un conflito sucesorio tras a morte do Carlos II de Habsburgo en 1700, e que supuxo a chegada ao trono dunha **nova dinastía, a dos Borbón**, coa figura de **Felipe V**.



A nova monarquía comeza un programa de centralización política cos **Decretos de Nova Planta**, que eliminaban as institucións dos reinos da Coroa de Aragón (que apoiara ao rival de Felipe V na Guerra de Sucesión, o arquiduque Carlos de Austria). Esta vontade centralizadora, sen embargo, non acadaba todo o territorio, xa que se manteñen os foros de Navarra e as provincias vascas, que apoiaran a causa borbónica.

O **despotismo ilustrado** tamén se manifestará na Coroa española, principalmente durante o reinado de **Carlos III** (1759-1788), quen levará a cabo diversas tentativas de modernización a través da construción de obras públicas, da creación de academias ou da posta en marcha dalgunhas reformas económicas. Estas tentativas atoparán a oposición da nobreza e o clero, estamentos privilexiados que seguían mantendo un gran poder no século XVIII. Entre as figuras da Ilustración en España destacan Gaspar Melchor de **Jovellanos** ou o Conde de **Floridablanca**.

En **Galicia** mantéñense as estruturas económicas e sociais características do Antigo Réxime, destacando a **fidalgúa** como baixa nobreza non propietaria que obtén os seus recursos do cobro das rendas dos **foros**, contratos agrarios de moi longa duración aos que está sometido o campesiñado.

Na Ilustración galega ten grande importancia o clero, con figuras como Benito Xerónimo Feijóo (o **Padre Feijoo**) ou Frei **Martín Sarmiento**.

8. Un símbolo do Antigo Réxime e o absolutismo: o pazo de Versalles



O inmenso **pazo de Versalles** vaise configurando ao longo do reinado de Luis XIV como o eixo da vida política francesa e auténtico símbolo do absolutismo. En Versalles, cerca de París, tiña a familia real un pequeno pazo de caza que Luís XIV converteu no pazo máis luxoso da Europa da súa época, símbolo da elegancia, o luxo e o refinamento. Alí decidiu fixar a súa corte, lonxe de París e das antigas residencias reais (coma o Louvre), que se facían pequenas para albergar ás 20.000 persoas que chegaron a habitar en Versalles, entre nobres e servizo. E alí trasladou á alta nobreza para vixiala de cerca e evitar así calquera intento de rebelión que puidera xurdir, para o cal non escatimou medios: os bailes, banquetes, representacións teatrais e festas que se prolongaban durante varios días eran famosos en toda Europa e mantiñan aos ociosos nobres entretidos e controlados, evitando conspiracións en contra do rei.

A arquitectura, a decoración e a propia liturxia da rutina levada a cabo diariamente en Versalles tiñan un só obxectivo: que ninguén esquecera quen era o **Rei Sol** e o abismo que separaba a este do común dos mortais. Do mesmo xeito que os planetas xiran arredor do Sol, Luís XIV estaba convencido de que toda a corte, e mesmo toda Francia, debía gravitar ao seu redor e non escatimou esforzos para conseguilo. Por este motivo, este monarca e o seu pazo son o símbolo máis logrado do absolutismo.